

SKUPŠTINA KANTONA SARAJEVO

**ZAPISNIK SA
SEDME RADNE SJEDNICE SKUPŠTINE KANTONA SARAJEVO,
ODRŽANE 07.09.2015. GODINE SA POČETKOM RADA U 10,00 SATI**

Sarajevo, oktobar 2015.

Sjednici su prisustvovali poslanici/zastupnici:

STRANKA DEMOKRATSKE AKCIJE

1. Ademović Kemal
2. Čelik Mirza
3. Čomor Eldar
4. Dovadžija Amar
5. Mešanović Safet
6. Kozadra Muhamed
7. Mašović Amor
8. Okerić Elmedin
9. Prevljak Fikret

DEMOKRATSKA FRONTA – ŽELJKO KOMŠIĆ

1. Akšamija Goran
2. Avdibegović Neira
3. Bukva Sejo
4. Kerla Bibija
5. Mehmedagić Mersiha
6. Pindžo Mirsad
7. Vukasović Mario

SAVEZ ZA BOLJU BUDUĆNOST – FAHRUDIN RADONČIĆ

1. Babić Ana
2. Bajrović Izudin
3. Filipović Selma
4. Jusko Ismir
5. Marić Zvonko
6. Rađo Dževad
7. Solaković Adnan

SOCIJALDEMOKRATSKA PARTIJA BOSNE I HERCEGOVINE

1. Srna Bajramović Srna
2. Šućur Slaviša

NAŠA STRANKA

1. Ćudić Sabina
2. Forto Edin
3. Kojović Predrag

BOSANSKA STRANKA – MIRNES AJANOVIĆ

1. Haris Pleho

BOSANSKOHERCEGOVAČKA PATRIOTSKA STRANKA – SEFER HALILOVIĆ

1. Halilović Semir

SAMOSTALNI POSLANICI/ZASTUPNICI

1. Bjelak Nermin
2. Aljović Hamed

Sedmu Radnu sjednicu Skupštine Kantona Sarajevo otvorio je predsjedavajući Sejo Bukva. Prema evidenciji Službe, sjednici prisustvuje 31 poslanik, što je dovoljan broj za punovažan rad i odlučivanje.

Izostanak sa ove sjednice opravdali su: Sabahudin Delalić, Rasim Smajić. Amel Mekić.

UTVRĐIVANJE DNEVNOG REDA

Prijedlog dnevnog reda Sedme Radne sjednice Skupštine Kantona Sarajevo utvrdio je Kolegij Skupštine na sjednici održanoj dana 23.09.2015.godine.

Na osnovu člana 73. Poslovnika Skupštine Kantona Sarajevo Kolegij Skupštine dana 02.10.2015.godine, prihvatio je zahtjev Vlade Kantona Sarajevo i Zakonodavno-pravne komisije, da se Prijedlog dnevnog reda Sedme Radne sjednice, dopuni sa sljedećim tačkama:

- 1. Prijedlog zakona o izmjenama Zakona o komunalnim djelatnostima – skraćeni postupak;*
- 2. Prijedlog autentičnog tumačenja odredaba člana 163. stav (15) Zakona o visokom obrazovanju*

Prije prelaska na utvrđivanje Dnevnog reda predsjedavajući je podsjetio da u skladu sa odredbama člana 161. Poslovnika Skupštine Kantona Sarajevo o prijedlozima zakona po hitnom postupku, Skupština odlučuje kao o prethodnom pitanju prije utvrđivanja dnevnog reda sjednice.

U okviru prethodnog postupka premijer Elmedin Konaković je dao uvodne napomene za razmatranje Prijedlog zakona o preuzimanju, izmjenama i dopunama Zakona o zakupu poslovnih zgrada i prostorija, po hitnom postupku.

PREDSJEDVAJUĆI JE POZVAO POSLANIKE DA PRISTUPE IZJAŠNJAVANJU DA SE PRIJEDLOG ZAKONA O PREUZIMANJU, IZMJENAMA I DOPUNAMA ZAKONA O ZAKUPU POSLOVNIH ZGRADA I PROSTORIJA DONESE PO HITNOM POSTUPKU.

SKUPŠTINA JE JEDNOGLASNO (31 "ZA") USVOJILA PRIJEDLOG DA SE ZAKON O PREUZIMANJU, IZMJENAMA I DOPUNAMA ZAKONA O ZAKUPU POSLOVNIH ZGRADA I PROSTORIJA DONESE PO HITNOM POSTUPKU.

Skupština Kantona Sarajevo je jednoglasno (31 “za”) za Sedmu Radnu sjednicu utvrdila sljedeći

DNEVNI RED:

1. Poslanička/zastupnička pitanja, inicijative i odgovori;
2. Prijedlog zakona o obrazovanju odraslih;
3. Prijedlog zakona o preuzimanju izmjenama i dopunama Zakona o zakupu poslovnih zgrada i prostorija-hitni postupak;
4. Prijedlog zakona o izmjenama Zakona o komunalnim djelatnostima – skraćeni postupak;
5. Nacrt zakona o prijavljivanju, porijeklu i kontroli imovine izabranih i imenovanih dužnosnika i savjetnika u Kantonu Sarajevo;

6. Prijedlog autentičnog tumačenja odredbe člana 163.stav (15) Zakona o visokom obrazovanju;
7. Prijedlog odluke o pristupanju izradi Izmjena i dopuna Prostornog plana posebnog područja prirodnog naslijeđa „Vodopad Skakavac“;
8. Prijedlog odluke o usvajanju Programa uređenja građevinskog zemljišta i realizacije kapitalnih investicija za 2015. godinu;
9. Prijedlozi odluka o davanju saglasnosti na Program rada sa finansijskim planom JU za 2015.godinu:
 - a) "Narodno pozorište" Sarajevo sa finansijskim planom za 2015. godinu;
 - b) "Sarajevska filharmonija" sa finansijskim planom za 2015. godinu;
 - c) "Pozorište mladih Sarajevo" sa finansijskim planom za 2015. godinu;
 - d) "Kamerni teatar '55" Sarajevo sa finansijskim planom za 2015. godinu;
 - e) "Sarajevski ratni teatar - SARTR" sa finansijskim planom za 2015. godinu;
 - f) "MES – Međunarodni teatarski festival – Scena MESS" sa finansijskim planom za 2015. godinu;
 - g) Muzej Sarajevo sa finansijskim planom za 2015. godinu;
 - h) Kantonalni zavod za zaštitu kulturno-historijskog i prirodnog naslijeđa Sarajevo sa finansijskim planom za 2015. godinu;
 - i) Historijski arhiv Sarajevo sa finansijskim planom za 2015. godinu;
 - j) "Biblioteka" Sarajevo sa finansijskim planom za 2015. godinu;
 - k) Muzej "Alija Izetbegović" sa finansijskim planom za 2015. godinu;
 - l) Centar za kulturu Kantona Sarajevo sa finansijskim planom za 2015. godinu.
10. Izvještaj o radu i finansijskom poslovanju Javne ustanove "Biblioteka Sarajevo" za 2014. godinu;
11.
 - a) Izvještaj o poslovanju Kantonalnog javnog komunalnog preduzeća „GRAS“ d.o.o. Sarajevo u 2013. godini;
 - b) Izvještaj o poslovanju Kantonalnog javnog komunalnog preduzeća „GRAS“ d.o.o. Sarajevo u 2014. godini;

U skladu sa stavom Zakonodavno-pravne komisije predlagač je prihvatio da se "*Nacrt zakona o prijavljivanju, porijeklu i kontroli imovine izabranih i imenovanih dužnosnika i savjetnika u Kantonu Sarajevo*" razmatra kao prednacrt.

Uz poziv za sjednicu, kao informativni materijal, dostavljeni su vam:

1. *Informacija Ministarstva saobraćaja Kantona Sarajevo po Zaključku Vlade Kantona Sarajevo, broj: 02-05-6161-19.2/15 od 16.04.2015. godine i po Zaključku Skupštine Kantona Sarajevo, broj: 01-05-2901-1/15 od 23.03.2015. godine;*
2. *Informacija u vezi sa sedam nezakonito zaključenih ugovora o radu u Javnoj ustanovi "Kantonalni centar za socijalni rad", te problemom isplate plaća;*
3. *Informacija o stanju kriminaliteta, javnog reda i mira i sigurnosti saobraćaja na području Kantona Sarajevo za period juli 2015.godine;*
4. *Informacija Ministarstva za obrazovanje, nauku i mlade o ispunjenosti zakonskih uvjeta za rad osnovnih škola kao samostalnih pravnih subjekata;*
5. *Konačan izvještaj o izvršenoj reviziji finansijskih izvještaja Budžeta Kantona Sarajevo za 2014. godinu i Izvještaj o poduzetim aktivnostima budžetskih korisnika po preporukama Ureda za reviziju institucija u FBiH za 2014. godinu;*

Prije realizacije prve tačke dnevnog reda Skupština se izjasnila o Zapisniku sa Stenogramom sa Šeste radne sjednice Skupštine Kantona Sarajevo.

Skupština je jednoglasno (31 "za") potvrdila Zapisnik sa Šeste radne sjednice Skupštine Kantona Sarajevo održane 02.09. i 09.09.2015.godine.

AD – 1.

POSLANIČKA/ ZASTUPNIČKA PITANJA I INICIJATIVE

Prijavljeni zastupnici za pitanja i inicijative: Aljović Hamed, Avdibegović Neira, Bajrović Izudin, Čelik Mirza, Filipović Selma, Forto Edin, Halilović Semir, Jusko Ismir, Kojović Predrag, Marić Zvonko, Mešanović Safet, Mehmedagić Mersiha, Okerić Elvedin, Pindžo Mirsad, Pleho Haris, Prevljak Fikret, Solaković Adnan, Srna Bajramović Segmedina i Vukasović Mario.

Zastupnik Hamed Aljović je postavio pitanje upućeno ministru komunalne privrede i infrastrukture kako slijedi:

"Koje mjere je do sada poduzeo i koje će poduzeti nadležno Ministarstvo u popravci oštećene rasvjetnih tijela u Općini Trnovo kako stanovnici Trnova ne bi i dalje bili u mraku?"

Drugo pitanje upućeno je premijeru Kantona Sarajevo: "Kada će se osnovno i srednje obrazovanje u Kantonu Sarajevo kao jedna od najvažnijih oblasti podesiti pod adekvatnu zakonsku regulativu s obzirom da smo svjedoci da u sadašnjoj situaciji u oblasti obrazovanja glavnu riječ vode udruženja građana?"

Zastupnica Neira Avdibegović je postavila pitanje upućeno ministru saobraćaja:

"Da li se svakodnevno svjesno u promet puštaju tehnički neispravna vozila javnog gradskog prevoza, na sto ukazuju brojne nesreće koje u opasnost dovode kako građane Kantona Sarajevo, tako i radnike KJKP GRAS d.o.o. Sarajevo?"

Obrazloženje:

"Prema informacijama dobivenim od građana koji su se zadesili na licu mjesta, prethodnog mjeseca, u samo par dana, desile su se tri nesreće uzrokovane neispravnošću vozila javnog gradskog prevoza.

Naime, u dva slučaja, na lokacijama Kobilja Glava /Opština Vogošća/ i Ilidža, dva autobusa KJKP Gras, puna putnika, su se u toku vožnje zapalila. Treća nesreća, navodno uzrokovana neispravnošću kočnica autobusa, se desila u Semizovcu.

Smatrajući da je učestalost ovakvih i sličnih nesreća veoma zabrinjavajuća i da dovodi u pitanje bezbjednost svih saučesnika u saobraćaju, molim za odgovor da li se provjerava tehnička ispravnost vozila prije njihovog puštanja u saobraćaj, i ukoliko da, ko vrsi istu?"

Zastupnica Ana Babić je postavila pitanje Sameru Rešidatu ministru kulture i sporta:

"Kulturna javnost u Kantonu Sarajevo je tražila poništenje konkursa za izabrane članove upravnih i nadzornih odbora svih ustanova kulture. Razlog za ovo je činjenica da u upravnim i nadzornim odborima, većina ljudi ne ispunjava ni osnovne uvjete za obavljanje te dužnosti. Zato tražim u ime cijele kulturne javnosti da mi u najkraćem roku imena i prezimena, te biografije članova komisija koje su birale te članove u UO i NO, znači njihova imena i njihove biografije. A razlog je isključivo zbog toga što ti navedeni ljudi biraju direktore i direktorice i određuju na taj način budućnost naše kulturne politike, odnosno pozorišta i kulturnih ustanova. A to znači da se sluša u ovom slučaju partijska a ne stručna profiliranost.

Pri tome znamo da se u predizbornoj kompaniji itekako razgovaralo i govorilo da treba slušati i poštovati stručnost. Zato u ime očuvanja kvalitete kulture tražim da budete transparentni, a kao umjetnica u ime umjetnika u ovom gradu apeliram na vas gospodine ministre, da konačno poslušate glas umjetničke struke. Hvala lijepo."

Zastupnik Izudin Bajrović je pokrenuo inicijativu prema Ministarstvu komunalne privrede i infrastrukture i Ministarstvu zdravstva "da se izvrši čišćenje objekta i prostora oko objekta napuštenog i devastiranog doma penzionera u Nedžarićima, kao i deratizacija istog".

Obrazloženje:

"Osim što pomenuti objekat predstavlja ruglo za cijeli grad, zbog višedecenijskog nerješavanja sporova vezanih za imovinsko-pravne odnose, objekat doma penzionera je postao objektivna opasnost za okolno stanovništvo, budući da se tamo nastanio ogroman broj glodara i gmizavaca, koji ugrožavaju zdravlje stanovništva. Hvala."

Zastupnik Mirza Čelik je podnio inicijativu:

"Tražim od Ministarstva za boračka pitanja, Ministarstva kulture i sporta, kao i Ministarstva za rad, socijalnu politiku, raseljena lica i izbjeglice da dostavi ko koristi stanove u Otesu a zaključuju se od firme GPA? I po osnovu kojih kriterija se dodjeljuju stanovi?"

Obrazloženje:

"Zbog učestalih prijava 673 do oktobra, a Ministarstvo unutrašnjih poslova Ilidže od strane građana naselja Otes Općina Ilidža govori da je situacija na izmaku kontrole. U stanovima postoje porodice koje svakodnevno uništavaju osnovne stvari iz stanova, kao i vanjski izgled zgrade. Smatram da je neophodno izvršiti reviziju dodijeljenih stanova kao i izvršiti popis stvari u stanovima, kako bi se utvrdilo šta nedostaje u istim. Također smatram da je potrebno da se dodijeli jedan poslovni prostor u istoj zgradi MUP-u kako bi bar malo uveli mira građanima Otesa. Zahvaljujem."

Zastupnik Selma Filipović je dala komentar i postavila pitanje:

"Ja imam jedan komentar i jedno pitanje. Komentar se odnosi na odgovor ministru unutrašnjih poslova Kantona Sarajevo u Vladi gđinu Predragu Kurtešu. U vašem cijenjenom odgovoru na pitanje koje sam vam postavila na sjednici od 02.09.2015.godine na moju veliku žalost nisam dobila niti jednu mjeru, konkretnu aktivnost, i radnju resornog ministarstva kojem bi se osiguralo smanjenje stope nesigurnosti u Kantona Sarajevo. Smatram da je ovo pitanje od fundamentalnog značaja, te da je ono mnogo kompleksnije od pukih aktivnosti na smanjenju stope kriminaliteta. Ovim putem pozivam ministra da iskoristi resurse nauke i struke koje imamo u Kantona Sarajevo. I da nam u saradnji sa akademskom zajednicom i strukom sačini akcioni plan za smanjenje stope nesigurnosti u Kantona Sarajevo. Iako podržavam u cjelosti elaborat koji bi osigurao veću pokrivenost kantona stacioniranim radarskim sistemom, koji će ako ništa donijeti veći ubir sredstava u budžet, ali kazna koja će stići na kućnu adresu prekršioca koji je zbog prebrze vožnje izgubio život, vjerujte ne znači ništa. Mora se djelovati preventivno, kako bi se spriječila posljedica. A posljedica je gubitak mladog života te svakodnevno ugrožavanje sigurnosti građana u Kantonu Sarajevo. To je bio komentar
A pitanje postavljam pitanje da mi se odgovori u što kraćem vremenskom roku: "U kojem roku i u kojem postotku će se umanjiti cijena gasa u Kantonu Sarajevo za krajnje potrošače?"

Zastupnik Edin Forto je postavio pitanje upućeno premijeru Kantona Sarajevo:

"Radi se o projektu revitalizacije sarajevske žičare. Kao što znate, neki znaju a neki ne znaju. Ovo je projekat koji vodi Grad Sarajevo. Poznato nam je kako funkcioniše Grad Sarajevo i u kakve je probleme zapao dijelom i zbog nesporazuma sa ovom skupštinom, ali ovo je projekat za koji je stigla donacija u opremi i u novcu u vrijednosti od preko 7 miliona maraka. Ta donacija, a mnogi to ne znaju će propasti ukoliko do kraja godine ovaj projekat ne krene u pravcu gdje će biti neupitno njegovo dovršenje. Moje pitanje za premijera je zašto Kanton, tj zašto Vlada Kantona Sarajevo ne preuzme ovaj projekat i formalno od Grada Sarajeva kako ne bi propala donacija za ovu investiciju. Ja ću vam samo u obrazloženju kratko reći par stvari o ovom projektu. 2011 godine je stigla oprema iz Švicarske od jednog privatnog donatora koji je ustvari sarajevski zet. Čovjek je, jedini razlog što je donirao opremu je htio da jedan simbol grada vrati iz nekog svog osjećaja prema ovom gradu. Poslao je opremu koja već stoji od 2011, koja je, uglavnom dobar dio te opreme je već propao jer stoji napolju. Međutim jedan dobar dio te opreme se može iskoristiti, posebno kabine. 2013 godine znajući, ustvari vidjevši da Grad Sarajevo nije daleko stigao sa rješavanjem problema za revitalizaciju Trebevičke žičare poslao i novčanu donaciju od 3,8 miliona eura koje stoje. Znači to je keš gotovinski iznos koji stoji na posebnom računu samo za taj projekat. Ako prepustimo ovaj projekat Gradu Sarajevo da ga nastavi u svojim pokušajima da ovaj projekat dovede do kraja ovaj novac će propasti jer je investitor u više navrata rekao ako do kraja ove godine se ne pokrene projekat do te tačke gdje je neupitno njegov završetak, novac će biti povučen. Nemojte premijeru dozvoliti, vi imate kapacitet ovo da uradite, nemojte dozvoliti da nam propadne 7 miliona KM gotovinskih za obnovu žičare koja mislim da svima nama bi bio jedan projekat od velike važnosti. Hvala."

Zastupnik Semir Halilović je postavio pitanje kako slijedi: "Pitanje za Vladu Kantona Sarajevo ili premijera. Dakle zanimaju me efekti rada našeg ureda u Briselu u oba smjera. Dakle, i inicijative koje se tiču privredno zakonodavnog dijela koje dolaze odozgo prema Vladi Kantona Sarajevo, i one inicijative koje Vlada Kantona Sarajevo u cilju poboljšavanja svojih zakonodavstava pristupa fondovima inicirala prema Uredu u Briselu.

Drugo pitanje je za Ministarstvo unutrašnjih poslova Kantona Sarajevo "zanima me samo obim odbačenih prijava koje su oni uputili prema Tužilaštvu Kantona Sarajevo u ovoj godini i obrazloženje zašto su odbačeni, nestručno, nedostatak dokaza, itd."

Poslanik/zastupnik Ismir Jusko je pokrenuo inicijativu i postavio jedno poslaničko pitanje:

"Veliki broj građana Sarajevskog Kantona žali se da neodgovorni vlasnici vozila parkiraju i ostavljaju da godinama njihova vozila budu deponovana, a ne parkirana na javnim površinama, od kojih su mnoga u raspadajućem stanju i kojima je registracija istekla prije više godina. Time zauzimaju parking mjesta, zauzimaju javnu površinu i oduzimaju prava našim sugrađanima da na tim mjestima svakodnevno parkiraju svoja vozila. Mnogi od vlasnika čak i ne žive u zgradama ispred kojih su parkirana ta vozila, već uredno deponuju dva kvarta dalje i godinama ne dolaze da vide šta se dešava sa njihovim vozilima. Trenutni zakon vezan za ovu problematiku nije istu regulisao na pravi način i tim omogućava da se ovaj problem u kontinuitetu nastavlja. Tražimo da se postojeći zakon izmjeni, da se ovaj problem riješi tako što će se omogućiti uklanjanje ovih vozila sa javnih površina i omogućiti našim građanima da te površine svakodnevno koriste.

Moje poslaničko pitanje

Prije dva i pol mjeseca tražio sam da mi se dostavi Izvještaj rada direktorice PPZ-a. Program rada koji je dostavljen nije Program rada direktorice, niti nam je dostavljen Izvještaj o aktivnostima direktorice, koji bi trebao da bude javan i objavljen na web stranici Ministarstva. U Programu nam je navedeno da se u nekim dijelovima svog rada direktorica se bavi

"saradnjom" sa nekim institucijama. Ja se izvinjavam, saradnja nije program rada i to su dijelovi aktivnosti koji spadaju u svakodnevnu komunikaciju direktorice. Opis njenih poslova bi trebao biti edukacija direktora, izrada i davanje prijedloga za dokumente koji će unaprijediti odgojno obrazovni rad u Kantonu Sarajevo. Dakle, ne postoji usvojen izvještaj o radu direktorice ove institucije, niti nam je dostavljen Program rada direktorice. U Programu rada su nam navedeni poslovi stručnih savjetnika, a ne aktivnosti i poslovi koje treba i mora imati direktor svake institucije.

Ministar pravde i uprave je trebao na današnjoj Skupštini pripremiti Izmjene Zakona o organizaciji i djelokrugu upravnih organizacija, koji ide po kratkom postupku, bez rasprave i sa jasnim obrazloženjem, i prema kojem se Zavod transformiše u Sektor. Inicijativa Ministarstva za obrazovanje, nauku i mlade Kantona Sarajevo je prošla 4. 8. a krajnji rok za izmjenu Zakona je bio 4. 10. To do sada nije urađeno. Te molim dvije stvari: da nam direktorica ne vrijeđa inteligenciju već da nam pošalje svoj razvojni program rada, koji očigledno nema, i da nam ministar pravde šta se dešava s ovom problematikom. Hvala."

Zastupnik Predrag Kojović je postavio pitanje kako slijedi:

"Ja ću postaviti pitanje na koje bih molio odgovor u pismenom obliku da mi se dostavi što prije, najkasnije do iduće sjednice, kako je to Poslovnikom regulisano. A on se tiče događaja koji se dogodio prilikom odigravanja gradskog derbija fudbalskih klubova Sarajevo i Željezničar, pred stadionom FK Željezničar u kome je jedan navijač, prolaznik, priveden od strane policije i predan u ruke zaštitarskoj agenciji, koja koliko se moglo vidjeti na snimku primijenila je potpuno neprimjerenu neprikladnu silu protiv tog našeg građanina. I ovo je pitanje koje je upućeno i ministru unutrašnjih poslova i Komesaru direktoru policije sarajevske. Tražim da mi se dostavi detaljni izvještaj o incidentu i sve ono što je uslijedilo kao konsekvencija toga, da li su identifikovani ljudi koji su primijenili tu silu, koji su procesi poduzeti protiv njih itd. Hvala."

Zastupnik Zvonko Marić je dao komentare:

"Ja prije svega imao sam nekoliko pitanje međutim ponukan sam činjenicom da se ne poštuje Poslovnik od ljudi od kojih se traži odgovor na neka pitanja. Evo i gospodin Kojović je to potencirao i nisu u skladu sa Poslovnikom dostavili u roku od mjesec dana nekoliko njih, ne znam zašto, da li je riječ o nezgodnim pitanjima koja postavljam ili je to tabu tema o kojoj ne treba govoriti. Tako sam uskraćen za nekoliko odgovora, ne ja nego oni ljudi koji su dali glas za mene pored ostalog o tome koliko je do sada podneseno predmeta Tužiteljstvu. Tužiteljstvo to radi vrlo korektno i profesionalno, barem za sada i to je dodatni razlog što više vjerujem tužiteljstvu nego MUP Kantona koji ne pokazuje čak ni minimum pristojnosti u obavljanju svojih poslova koji su u zakonskim okvirima i njihova je to obaveza dakle prije svega ali mogli bi pokazati jednu dozu ozbiljnosti prilikom komunikacije sa zastupnicima i ovim parlamentom, što je svakako izostalo. Primjera radi, posljednji put sam dopunski postavio pitanje koliko je ukupan broj primljenih predmeta od tužiteljstva koje MUP podnio. Dobio sam od Tužiteljstva odgovor i u tom ime se zahvaljujem tužiteljici Dalili Burzić koja je potpisala ovaj dokument u kojem se kaže da je po godinama za koje sam tražio te podatke, 2011 godina 7455, za 2012 8459, 2013 9825, za 2014 10352, za period od 01.01. 30.06. tekuće godine 4.875.

Ako ste primijetili, iz godine u godinu za preko 1000 krivičnih predmeta po nepoznatom počinitelju je više. Pa šta zapravo policija radi? Zato možda i nedostavlja dokumente. Molim ministra dakle, da uozbilji službe koje su nadležne za ovakve stvari i da poštuju malo i ovaj parlament. Druga stvar, kada bi ste uporedili ove podatke, vidjeli bi ste da ukupan broj i po poznatom i nepoznatom počinitelju nije ni približan ovom broju koje tužiteljstvo po nepoznatom šalje. I druga stvar, želio sam postaviti još brojna pitanja ali neću više ovo

komentirati, jer je ovo ispod svakog dostojanstva komunicirati sa nekim ko je neozbiljan, ali ću reći sljedeće: vezano za ovo što je gospodin Bajrović potencirao, Dom penzionera. Postavio sam također pitanje, nisam dobio odgovor, pa taj Dom penzionera pripada penzionerima, neko čuva za privatizaciju, i ovo se dešava što se dešava, odugovlači se, niko mi nije odgovorio status tog. Pa to je stečeno pravo penzionera kao što je i penzija a ne milostinja."

Zastupnik Kemal Ademović je pokrenuo inicijativu "da Vlada Kantona Sarajevo u što kraćem roku snizi kranjem korisniku cijenu koštanja prirodnog gasa, ili plina za koji medijski znam i proteklih sjednica je objavljeno da je BH gas snizio za 15%. Dakle različite su špekulacije u tome hoće li doći do sniženja cijene gasa u kojem će to procentu biti, ali bih volio da se Vlada izjasni o tome i da se izvrši sniženje cijene gasa, jer praktično grejna sezona je na pragu jer samo što nije nastupila. I sve količine prirodnog gasa koje ulaze u Kanton Sarajevo sada ulaze po cijeni koja je 15% jeftinija. Da nas ne dočekaju one fakture i računi koji neće biti umanjeni, ako Vlada se možda odluči na to da snizi cijenu gasa a to ne uradi blagovremeno".

Zastupnik Safet Mešanović je pokrenuo inicijativu ispred Kluba SDA, a u ime udruženje Srce za djecu koja boluju od raka u FBIH. Dakle podnosim inicijativu "za dodjelu granta iz budžeta u 2015 godini. Odmah da napomenem da je roditeljska kuća u pitanju, u pitanju je izgradnja Roditeljske kuće na Jezeru" i moram reći da je Vlada Kantona izdvajala sredstva u 2014 godini, također Ministarstvo za rad, socijalna pitanja i raseljenih Kantona Sarajevo je također u ovoj godini izdvojilo određena sredstva. Međutim, budući da je ovaj projekat koji je vrijednosti cca 1,2 miliona u završnoj fazi i da su velike potrebe za ovom Roditeljskom kućom, negdje su potrebna sredstva da bi se završio ovaj projekat, a riječ je o mašinskim instalacijama, zanatskim radovima, stolarskim radovima, potrebna su sredstva od cca 120.000 KM. Imamo upit Udruženja za izgradnju lifta koji košta sa ugradnjom nekih 31.000 KM. Dakle molim premijera i Ministarstvo za raseljena lica, odnosno socijalnu politiku, raseljena lica i izbjeglice Kantona Sarajevo da se pokušaju iznaći ova sredstva. Dakle, molba ide nikako nikakav imperativ, molba da se iznađu ova sredstva. Za danas sam također imao i pitanje za ministra Fišu, ministra saobraćaja, međutim odustajem od tog pitanja i smatram da sva ona pitanja i inicijative koja su lišena politikanstva mogu se na vrijeme dobiti odgovor, odnosno mogu biti realizovana. Riječ je bila o Gras-u i neredovnim linijama u pojedinim naseljima. Ministar je obećao da ćemo to još u toku ove sedmice riješiti tako da odustajem od pitanja prema Ministarstvu za saobraćaj."

Zastupnica Mersiha Mehmedagić je postavila zastupničko pitanje upućeno Ministarstvu privrede i Vladi Kantona Sarajevo:

"Koje konkretne mjere su poduzete, ili se planiraju poduzeti, kako bi se obezbijedila decidna primjena Ugovora o koncesiji i unaprijedili mehanizmi naplate koncesione naknade"?

U prilogu odgovora tražim detaljan pregled:

- obaveza i uplata po korisnicima za eksploataciju mineralnih sirovina i voda po osnovu potpisanih Ugovora o koncesiji i Odluke o plaćanju nadoknade za istraživanje i eksploataciju mineralnih sirovina i vode za 2014.godinu;
- korisnika koji eksploatišu prirodne resurse bez zaključenog Ugovora;
- zahtjeva za pokretanje tužbi za korisnike koji krše potpisani Ugovor i Odluku;
- odobrenja za eksploataciju mineralnih sirovina i vode za 2015.god,
- dodijeljenih koncesija u 2015.godini.

Obrazloženje:

"Planirani prihod po osnovu koncesija za eksploataciju mineralnih sirovina i vode za 2015.godinu iznosi 1.237.500 KM, a u projekciji Budžeta za 2016.godinu se planira i povećanje na 1.300.000KM.

Analiziramo li pak ove prihode samo u prethodne dvije godine, primijetit ćemo katastrofalnu realizaciju planiranih prihoda.

Naime, u 2014.godini na poziciji Prihodi od davanja prava na eksploataciju prirodnih resursa, planirano je 1.500.000 KM, a ostvareno 345.545 KM, dok je u 2013.godini ostvareno 391.652 KM. To je približno jedna četvrtina planiranih prihoda, ostalo dajemo "na kafu" privatnicima. Ovaj stepen naplate zahtijeva hitnu reakciju Vlade i resornog Ministarstva kako bi se obezbijedio veći priliv sredstava za Budžet i efikasnije upravljanje prirodnim resursima. Donošenje Pravilnika o uspostavljanju i vođenju registra o koncesijama samo je prvi korak koji je Vlada napravila.

Pitanje efikasnijeg upravljanja prirodnim resursima je imperativ u situaciji kada zaduživanjem krpimo budžetske rupe, i kada se Kanton suočava sa redukcijama u vodosnabdijevanju. Izvori pitke vode moraju puniti prazne vodovodne cijevi građana Kantona ili Budžet kojim će se ovaj problem riješiti. Zahvaljujem."

Zastupnik Elvedin Okerić je postavio pitanje za MUP Kantona Sarajevo:

"Dana 26.09.2015.godine, 3. dan Kurban bajrama glavnim sarajevskim ulicama i tržnim centrom BBI pronesen je ogromni penis u sklopu nekog performansa. Bez stida i straha paradirali su glavnim ulicama Sarajeva. Javni prostor ne može narušavati kako ko hoće i kad hoće.

Sa stanovišta opšte kulture, poštovanja ljudi, obzira prema našim najmlađim bićima ovo je nedopustivo.

Komisija za sigurnost Skupštine Kantona Sarajevo je Zaključkom na zadnjoj sjednici tražila informaciju od MUP-a Kantona Sarajevo o pomenutom događaju.

Iz tehničkih razloga nisu nam mogli dostaviti informaciju pismeno do današnje sjednice Skupštine. U usmenom razgovoru dobili smo informaciju da skup nije prijavljen, što je protivno Zakonu o javnom okupljanju.

Pitanje Ministarstvu unutrašnjih poslova "da li su poduzeli aktivnosti iz svoje nadležnosti vezano za ne prijavljivanje pomenutog javnog okupljanja u pokretu koje se odvijalo glavnim ulicama našeg Grada"?

Poslanik/zastupnik Mirsad Pindžo je pokrenuo inicijativu da Skupština donese ove predložene zaključke:

- 1. Zadužuju se svi ministri u Vladi Kantona Sarajevo koji vrše nadzor nad poslovanjem JU, agencija, direkcija, fondova i zavoda, čiji je osnivač Kantona Sarajevo i Vlada Kantona Sarajevo da pripreme i predlože Vladi i Skupštini Kantona Sarajevo izmjene zakona koji tretiraju ove oblasti i osnivačka akta navedenih organizacija u smislu preciziranja odredbi za izabrani i imenovani zvaničnici na bilo kojem nivou vlasti istovremeno ne mogu obnašati upravljačke i rukovodne dužnosti u istim.*
- 2. U resorima gdje se ta imenovanja vrše po zakonima viših nivoa vlasti zadužuju se ministri da u Vladi Kantona Sarajevo predlože izmjene pravilnika, uredbi, odluka ili drugih akata koji regulišu tu oblast i tako usvojene akte dostave Skupština Kantona Sarajevo, informativno.*
- 3. Zadužuje se Vlada Kantona Sarajevo da prijedlog izmjena navedenih propisa predloži u hitnoj proceduri u roku od 30 dana.*

Vrlo kratko obrazloženje. Pošto se radi o vrlo malim dopunama, izmjenama zakona, eventualno jedan ili najviše dva člana, zato predlažem da se to uradi u hitnoj proceduri. O principijelnosti i moralnosti izabranih zvaničnika ne bih, ali mislim da je svima u ovoj Sali jasno šta se ovim želim postići. Ono što bi trebalo da bude kao princip, se ne poštuje, očito nama treba sve zakonski precizirati i ja zato predlažem da Skupština donese ove zaključke.

Zastupnik Haris Pleho je postavio pitanje za ministra obrazovanja:

"Molim ministra obrazovanja da mi odgovori da li je istina Osnovnoj muzičkoj školi Ilidža imaju tri direktora i da li sva trojica primaju platu direktora"?

Zastupnik Fikret Prevljak je pokrenuo dvije inicijative: "Jednu inicijativu bih pokrenuo prema Ministarstvu za boračka pitanja da se u okviru budžeta obezbijede sredstva za plaćanje školovanje djece demobilisanih boraca. Vjerovatno nismo u mogućnosti svima obezbijediti ali bih znam da Ministarstvo i ministar koji je na čelu tog ministarstva imaju volju da se pomogne ovom dijelu boračke populacije da se obezbjediti bar koji su ugroženi i da se obezbjediti prema djeci koja su imala tokom svog školovanja izuzetne rezultate".

Drugu inicijativu bih pokrenuo prema Direkciji za ceste Kantona Sarajevo a to je u skladu sa Poslovníkom Skupštine podnosim ovu inicijativu "da se što prije krene u sanaciju udarnih rupa u Ulici Nikole Šopa. To je na potezu Terminal sa Stupa prema podvožnjaku Željezničke pruge koja saobraća prema Sarajevo-Ploče". A da se u budžetu Kantona Sarajevo planiraju sredstva za rekonstrukciju za 2016 godinu. Trenutno na tom dijelu puta rađena je izgradnja kanalizacije mreže za naselje Tibra Pacifik. Pošto je saobraćajnica oštećena, na tom dijelu građani su inače svjedoci da iz dana u dan dolazi do pucanja vodovodnih cijevi na istoj dionici saobraćajnica. Također iz razloga slaganja tla.

Zastupnik Adnan Solaković je pokrenuo inicijativu: "Zašto je ministar donio odluku da se Savez ritmičke gimnastike briše, koji broji šest klubova, a šest klubova je nastupalo na državnom prvenstvu, ostvarilo najbolje rezultate u seniorskoj, juniorskoj kadetskoj konkurenciji. A gimnastičarki savez koji se sastoji od tri kluba samo jedan je učestvovao na državnom prvenstvu, a druga dva nisu imala ni registrovane takmičare na nivou države. Klubovi u Savezu ritmičke gimnastike ostvaruju i na međunarodnom nivou kvalitetne rezultate a odluka ministarstva je dovela u situaciju da se vrši pritisak da klubovi ne mogu učestvovati u takmičenjima te da se brišu iz Saveza. Na osnovu zadnje odluke ministra za kulturu i sport o poništenju i brisanju naziva Kantonalni savez ritmičke gimnastike Kantona Sarajevo i pored informacije o razlozima formiranja saveza i potrebe da se ova dva saveza Savez ritmičke gimnastike i Gimnastičarski savez ujedine na demokratskom i zakonom predviđenom principu pokrećem inicijativu da se gimnastički sport ujedini na nivou Kantona i da svi klubovi budu ravnopravni na istim pravima da biraju i da budu birani kao i pravo na rad. Kantonalni savez nije obično udruženje građana i osnivači ne mogu imati ekskluzivno pravo zastupanja i predstavljanja a naročito ako ne poštuju prava većine klubova na nivou Kantona. Tražimo da Ministarstvo kulture i sporta Kantona Sarajevo donese odluku o spajanju ova dva saveza uz njihovo prisustvo a ovom prilikom želim da kažem da se imalo problema inače u sportu i želim da utiče se na Ministarstvo kulture, a ne sumnjam da ministar kulture neće izaći u susret da imamo probleme sa mnogim sportskim udruženjima i da se to što se kaže uokviri u jedan Savaz da je lakše raditi i da svi imaju ista prava.

Prema Vladi je postavio sljedeće pitanje:

"Budući da je tragično stradalo dijete na jednom od sarajevskih igrališta, pokrećem inicijativu da se ovoj Skupštini dostavi detaljan izvještaj istrage o okolnostima nesreće i odgovornosti nadležnih. Poznato Vam je da je napravljeno istraživanje koje su objavili mediji da 90 %

igrališta ne zadovoljava čak ni elementarne uslove sigurnosti. Ko je odgovoran za ovaj nemar i neodgovornost?"

Pitanje koje se odnosi na Ministarstvo unutrašnjih poslova.

"14.januara 2015.godine je odjeknula ekskluzivna vijest od strane MUP-a KS da su pronađeni i uhvaćeni sudionici koji su prenosili 10 kg heroina u vrijednosti od 600.000 KM, prilikom čega su uhvaćeni Jašarević Seid, vozač koji je vozio iz Holandije i Šurković Mevludin koji je preuzeo ruksak u kojim su se nalazi narkotici od istoimenovanog vozača. MUP je prilikom svoje izjave rekao : „ Da će se analizom utvrditi da li je to čisti ili izmiksani heroin i da li je za širu prodaju“ . Prilikom toga od MUP-a KS : komesar KS, portparol KS i tadašnji ministar MUP-a su dobili 30% dodatka na platu jer ovo spada pod djelo izvanrednih rezultate rada. Međutim utvrđeno je da se nije radilo uopšte o heroinu nego se o takozvanoj „heljdi“ ili sportskoj hrani proteini koje uzimaju sportisti. Postavljam pitanje da li će se vratiti novac za stimulans koji su dobili pripadnici MUP-a i ko će snositi novac za tužbe jer će ovi ljudi sigurno dobiti parnicu na sudu za navedeno?"

Zastupnik Segmedina Srna Bajramović je postavila dva pitanja kako slijedi:

"Ja danas imam dva pitanja i molim da mi se dostavi odgovor isključivo u pismenoj formi jer struktura pitanja je takva da iziskuje upravo ovakav odgovor.

S obzirom da mjesecima slušamo različite političke manipulacije na bazi budžetskog deficita, tražim od Ministarstva finansija da nam do naredne sjednice Skupština Kantona Sarajevo dostavi pregled kretanja istog po godinama, uključujući imena odgovornih ministara za svaki od perioda.

Obrazloženje: svima koji se ozbiljno bave politikom jasno je kako se radi o kategoriji koja je potpuno egzaktna te da apsolutno nema nikakvog prostora za bilo kakve političke optužbe u ovom segmentu. Te stoga smatram kako je izuzetno važno, prije svega zbog javnosti, da vrlo jasno i precizno dobijemo pregled deficita po godinama. Na taj način ćemo vrlo jasno demistificirati poziciju odgovornosti svakog od političkih subjekata za periode u kojima je upravljao finansijskim procesima u Kanton Sarajevo.

Moje drugo pitanje:

Svjesni smo također mjesecima političkih izjava u pozivu na odgovornost kada je u pitanju trovanje djece u vrtićima Ju Djeca Sarajeva pa me interesuje šta se u tom procesu utvrđivanja odgovornosti konkretno dešava, te šta su konačni rezultati istrage nadležnih organa? Stoga tražim da se Skupština Kantona Sarajevo dostavi cjelokupna informacija o navedenom slučaju jer je to naša obaveza. Prije svega prema roditeljima potom i javnosti te na kraju prema onima kojima je pod pritiskom nemilog događaja ustanovljena odgovornost bez prethodne cjelokupne analize činjenica.

Obrazloženje:

S obzirom da smo bili svjedoci pompozni najava o pokretanju odgovornosti za trovanje djece hranom u vrtićima, na žalost do danas nemamo apsolutno nikakvu informaciju kada su u pitanju rezultati cjelokupnog procesa koji su vodile nadležne službe. Svjedoci smo da je nova godina krenula u predškolskim ustanovama, te kako je ogromna odgovornost pred onima koji su zaduženi da utvrde činjenice u prethodnom postupku. Stoga očekujemo od nadležnih službi da u okviru informacije jasno prezentuje saznanja kako bi se preduprijedili slični slučajevi u budućnosti. Dakle, insistiram na odgovoru u pismenoj formi."

Zastupnik Mario Vukasović je pokrenuo jednu inicijativu i postavio jedno poslaničko pitanje:

Inicijativa je vezana za moje pitanje sa prošle sjednice a upućena je Vladi Kantona Sarajevo i Ministarstvu finansija Kantona Sarajevo.

"Prije nekih nepunih desetak dana u medijima je izašla lista najvećih primanja u JP, JU i fondovima u vlasništvu Kantona Sarajevo. Na prošloj sjednici ja sam tražio da se objave primanja svih zaposlenih u navedenim preduzećima, ustanovama, i fondovima. No lista je objavljena probrano, tj djelimično, te ovim putem ponavljam svoju inicijativu Vladi Kantona Sarajevo da zatraži i objavi od Porezne uprave FBiH kompletnu listu. Ona lista koja je procurila u javnost nisam dobio zvaničan odgovor od Vlade nego sam čisto pročitao iz medija. Na osnovu objavljene liste možemo primijetiti da pojedini direktori imaju primanja od šest, sedam, osam i više hiljada mjesečno. Što predstavlja kršenje Zakona o plata i naknadama članova organa upravljanja i drugih organa kantonalnih JP. Član 7 ovog Zakona predviđa kaznu od 5 do 15.000 KM, te me interesuje šta će Vlada Kantona Sarajevo poduzeti povodom ovoga te da li će se posegnuti za pravnim gonjenjem i što skorijem usklađivanju ovih plata sa zakonom?"

Poslaničko pitanje je upućeno na Ministarstvo obrazovanja, nauke i mladih Kantona Sarajevo, kao i Komisiji za mlade. Pitanje glasi:

"Molim Vas da mi dostavite preciznu informaciju o implementaciji Zakona o mladima FBiH, u kontekstu ispunjenja obaveza koje Vlada ima prema ovom Zakonu?"

Podsjećam, Zakon o mladima FBiH daje vrlo precizne odredbe za brigu o populaciji mladih a koje su vrlo jasno pobrojane u Zakonu".

Naš Kanton je jedan od prvih i jedan od rijetkih kantona koji u svojoj vladi uopšte imaju ministarstvo koje u svom nazivu ima mladi. Svakako da je to dobar prvi korak i dobro je da mladi imaju adresu na koju se mogu obratiti. No, interesuje me u kojoj je fazi cjelokupna implementacija preuzetih obaveza iz Zakona o mladima FBiH, npr. :

- Određivanje službenog lica koje će se baviti samo pitanjima mladih pri ministarstvu
- Donošenje strategije koja će obuhvatiti sve segmente od značaja za mlade ljude (zapošljavanje, obrazovanje, kultura i sport, zdravstvena zaštita, socijalna zaštita itd.).
- Pozicioniranje mladih u Budžetu KS
- Sve druge obaveze iz navedenog Zakona

Također, zamolio bih da se dostavi izvještaj o dosadašnjim aktivnostima Komisije za mlade Skupštine Kanton Sarajevo, te da Ministarstvo komisiju aktivnije uključi u sve navedene procese kako bi mladi konačno dobili punu implementaciju navedenog zakona. Hvala vam.

SKUPŠTINA JE VEĆINOM GLASOVA (22 "ZA" I 2 "SUZDRŽANA") NA PRIJEDLOG ZASTUPNIKA MIRSADA PINDŽE USVOJILA SLJEDEĆE

ZAKLJUČKE:

1. Zadužuju se svi ministri u Vladi Kantona Sarajevo koji vrše nadzor nad poslovanjem JU, agencija, direkcija, fondova i zavoda, čiji je osnivač Kantona Sarajevo i Vlada Kantona Sarajevo da pripreme i predlože Vladi i Skupštini Kantona Sarajevo izmjene zakona koji tretiraju ove oblasti i osnivačka akta navedenih organizacija u smislu preciziranja odredbi da izabrani i imenovani zvaničnici na bilo kojem nivou vlasti istovremeno ne mogu obnašati upravljачke i rukovodne dužnosti u istim.

2. U resorima gdje se ta imenovanja vrše po zakonima viših nivoa vlasti zadužuju se ministri da u Vladi Kantona Sarajevo predlože izmjene pravilnika, uredbi, odluka ili drugih

akata koji regulišu tu oblast i tako usvojene akte dostave Skupština Kantona Sarajevo, informativno.

3. Zadužuje se Vlada Kantona Sarajevo da prijedlog izmjena navedenih propisa predloži u hitnoj proceduri u roku od 30 dana.

AD – 2.

PRIJEDLOG ZAKONA O OBRAZOVANJU ODRASLIH

Prijedlog zakona su dobili uz poziv za sjednicu. Molim predstavnika Predlagača da podnese uvodne napomene.

Ministar za obrazovanje, nauku i mlade Elvir Kazazović je podnio uvodne napomene po ovom Prijedlogu zakona.

Nakon izlaganja ministra pitanja su postavili zastupnik Ismir Jusko i zastupnik Eldar Čomor. U diskusiji koja je uslijedila učestvovali su sljedeći zastupnici: **Adnan Solaković Zvonko Marić, Sabina Ćudić, Segmedina Srna Bajramović i Eldar Čomor.**

Zastupnik Zvonko Marić je ispred Kluba zastupnika SBB predložio sljedeće amandmane a predlaga ih je prihvatio:

Amandman I

Predlažemo da se u članu 10. Prijedloga zakona iz stava VI dodaje novi stav VII koji glasi: „ Neformalno obrazovanje odraslih koje nema status javno važećeg obrazovanja mogu provoditi i ostali pravni subjekti u skladu sa odredbama ovoga zakona“

Dosadašnji stav VII postaje stav VIII.

A evo i obrazloženje:

Ugradnjom ovog stava u član 10. dodatno bi se preciziralo neformalno obrazovanje predloženim stavom bi se ostavila mogućnost da pravna lica organiziraju interne edukacije za svoje radnike, dok bi se prethodne odredbe odnosile na organizatore obrazovanja odraslih koji izdaju javno važeću ispravu. Dakle, ostvarila bi se osnovna svrha neformalnog obrazovanja koje mora biti dostupno svim građanima. Mislim da je tu sve jasno.

Amandman II

Predlažemo brisanje teksta u članu 13. u stavu II tačka B. I to riječi :“Ustanove i centri za obrazovanje odraslih narodni radnički, otvoreni univerziteti kao i univerziteti za treću životnu dob.“

Obrazloženje:

Brisanjem riječi :“Ustanove i centri za obrazovanje odraslih narodni, radnički, otvoreni univerziteti, kao i univerziteti za treću životnu dob“ iz teksta tačke B predložena norma se dodatno poboljšava. Naime, osnivač specijalizirane ustanove za obrazovanje bi bio limitiran da specijaliziranim ustanova mora dati naziv kako je to navedeno. Posebno naglašavamo da su predloženi nazivi specijaliziranih ustanova za obrazovanje odraslih u značajnoj mjeri i arhaični.

Amandman III

Predlažemo da se članom 30 u stavu III iza riječi :“ ministarstva i drugih organa uprave“, dodaju riječi: „organizatora obrazovanja odraslih i drugih institucija“.

Obrazloženje:

Uslov za kvalitetan plan obrazovanja je uključivanje organizatora obrazovanja odraslih kao nosioca aktivnosti na relaciji obrazovanja odraslih u proces njenog donošenja. Naime, iskustva koja posjeduju organizatori obrazovanja odraslih, odnosno kontakti sa korisnicima i tržištem rada mogu predstavljati nemjerljiv doprinos u postupku pripreme plana obrazovanja odraslih. Svakako Ministarstvo i Vlada Kantona Sarajevo u konačnici odlučuju i donose plan obrazovanja nakon konsultacija sa zainteresiranim strukturama.

Amandman IV

Predlažemo da se u članu 35. tačka G brišu riječi : “za manje složena zanimanja”.

Obrazloženje:

Programi formalnog obrazovanja odraslih za osposobljavanje nisu nužno sami programi za manje složena zanimanja. Vjerovatno se radi i o tehničkoj omašci pa bi bilo dobro ispraviti to.

I mislim da jedan od suštinskih koji bi mogao da otkloni određene sumnje onih na koje se odnosi na ovaj Zakon je Amandman V.

Amandman V

Predlažemo da se u članu 40 stav II brišu riječi : “javnoj”.

Kako bi se dao prostor privatnim školama kao ustanovama da također sudjeluju u formalnom obrazovanju pod istim uvjetima i kriterijima kao javne škole pa se predlaže brisanje riječi „javno”.

Amandman VI

Predlažem da se u članu 50 iza stava I doda stav II i III koji glase:

„Realizacija programa za sticanje osnovnog obrazovanja za odrasle traje za prvi, drugi, treći i četvrti i peti razred po tri mjeseca, a šesti, sedmi, osmi i deveti razred po šest mjeseci. Ministar će posebnim pravilnikom propisati način organiziranja, provođenja, dužine trajanja, potrebni fond sati za sticanje srednje stručne spreme, programa prekvalifikacije, programa osposobljavanja, i programa brze obuke za potrebe poslodavaca”.

Dosadašnji stav II postaje stav IV

Smatramo da je neophodno zakonom predvidjeti rokove formalnog obrazovanja za sticanje osnovnog obrazovanja za odrasle. Prije svega ovakva i sličan zakonska rješenja su usvojena i u drugim kantonima i na nivou modela Zakona je predložila FBiH. Također je bitno predvidjeti obavezu ministarstva organa koji vrši stručni nadzor da propiše način organiziranja provođenja dužine trajanja potrebnog fonda sati za sticanje srednje stručne spreme. Realizacije programa prekvalifikacije, programa osposobljavanja, i programa brze obuke za potrebe poslodavaca kako bi se izbjegla eventualna zloupotreba pri realizaciji ovog programa od strane organizatora obrazovanja odraslih.

I na koncu, Amandman VII

Predlažemo da se u članu 68 u stavu I, iza tačke E doda nova tačka koja glasi, a to je tačka F, a glasi: „Pravilnik o načinu organiziranja provođenja dužine trajanja potrebnom fondu sati, za sticanje srednje stručne spreme programom prekvalifikacije, programom osposobljavanja, i programom brze obuke za potrebe poslodavca član 50 stav III.”

Dosadašnja tačka F i G postaju tačke G i H.

Obrazloženje:

Predloženi amandman je u vezi sa prethodnim amandmanima, a pošto ovaj član prepoznaje i definiše na jednom mjestu obaveze ministarstva i rokove za donošenje pravilnika, neophodno je u ovaj član ugraditi obavezu i rok za pravilnik čije se donošenje predviđa u članu 50 stav III ovoga zakona i hvala vam.

Izjašnjavanje po ovoj tački odgođeno je dok se ne ugrade usvojeni amandmani.

AD – 3.

PRIJEDLOG ZAKONA O PREUZIMANJU, IZMJENAMA I DOPUNAMA ZAKONA O ZAKUPU POSLOVNIH ZGRADA I PROSTORIJA-HITNI POSTUPAK

Prijedlog zakona su poslanici dobili uz poziv za sjednicu.

Ministar privede Muharem Šabić podnio je uvodne napomene po ovom Prijedlogu zakona.

Zastupnik Eldar Čomor kao predsjedavajući Komisije za prostorno uređenje, stambeno komunalnu politiku infrastrukturu i zaštitu okoliša Skupština Kantona Sarajevo je obrazložio stav ove komisije. Za diskusiju nije bilo prijavljenih pa se Ksupštini obratio premijer Elmedin Konaković.

NAKON ZAKLJUČENE RASPRAVE, PREDSJEDVAJUĆI JE POZVAO POSLANIKE DA PRISTUPE IZJAŠNJAVANJU O PRIJEDLOGU ZAKONA O PREUZIMANJU, IZMJENAMA I DOPUNAMA ZAKONA O ZAKUPU POSLOVNIH ZGRADA I PROSTORIJA.

SKUPŠTINA JE JEDNOGLASNO (27 "ZA") DONIJELA ZAKON O ZAKUPU POSLOVNIH ZGRADA I PROSTORIJA. .

AD – 4.

PRIJEDLOG ZAKONA O IZMJENAMA ZAKONA O KOMUNALNIM DJELATNOSTIMA – SKRAĆENI POSTUPAK

Prijedlog zakona su poslanici dobili u dopunskom materijalu.

U skladu sa članom 158. stav 2. Poslovnika Skupštine Kantona Sarajevo Predlagač je ukratko obrazložio razloge za donošenje ovog Prijedloga zakona po skraćenom postupku.

SKUPŠTINA JE JEDNOGLASNO PRIHVATILA DA SE PRETRES PRIJEDLOGA ZAKONA PROVEDE PO SKRAĆENOM POSTUPKU.

ZAKLJUČIVŠI RASPRAVU, PREDSJEDVAJUĆI JE POZVAO POSLANIKE DA PRISTUPE IZJAŠNJAVANJU O PRIJEDLOGU ZAKONA O IZMJENAMA ZAKONA O KOMUNALNIM DJELATNOSTIMA.

SKUPŠTINA JE JEDNOGLASNO (25 "ZA") DONIJELA ZAKON O IZMJENAMA ZAKONA O KOMUNALNIM DJELATNOSTIMA.

AD – 5.

PREDNACRT ZAKONA O PRIJAVLJIVANJU, PORIJEKLU I KONTROLI IMOVINE IZABRANIH I IMENOVANIH DUŽNOSNIKA I SAVJETNIKA U KANTONU SARAJEVO

Prednacrt zakona su poslanici dobili uz poziv za sjednicu.

Premijer Elmedin Konaković je podnio uvodne napomene po ovom Prednacrtu.

Nakon uvodnih napomena uslijedila je diskusija u kojoj su učestvovali sljedeći zastupnici: **Predrag Kojović, Bibija Kerla, Semir Halilović, Zvonko Marić, Mirsad Pindžo, Adnan Solaković, Izudin Bajrović, Sabina Ćudić i Kemal Ademović.** U raspravi su također učestvovali i ministar pravde i uprave **Enver Smajkan i premijer Elmedin Konaković.**

Skupština je po tezama za izradu Zakona o prijavljivanju, porijeklu i kontroli imovine izabranih i imenovanih dužnosnika i savjetnika u Kantonu Sarajevo jednoglasno donijela sljedeće

ZAKLJUČKE:

1. *Postoji potreba za donošenjem Zakona o prijavljivanju, porijeklu i kontroli imovine izabranih i imenovanih dužnosnika i savjetnika u Kantonu Sarajevo. Obavezuje se Skupština da navedeni Zakon u formi prijedloga razmatra prije donošenja Prijedloga budžeta Kantona Sarajevo za 2016.godinu;*
2. *Nacrt Zakona treba da se zasniva na načelima:*
 - *ustavnosti,*
 - *usklađenosti (sa pozitivnim pravnim propisima koji regulišu ovu oblast u Bosni i Hercegovini i Federaciji Bosne i Hercegovine),*
 - *provedivosti (donesenih rješenja),*
 - *nepovredivosti ličnosti (fizički i psihički integritet čovjeka, njegove privatnosti i ličnih prava, te dostojanstvo i sigurnost čovjeka).*
3. *Zakonom treba preciznije urediti sljedeća pitanja:*
 - *definisiranje izabranih zvaničnika,*
 - *definisiranje imenovanih zvaničnika i savjetnika i njihovih srodnika,*
 - *definisiranje prava imovine i stvari koje će biti obuhvaćene Zakonom, pa imamo na prijedlog ministra dodatak:*
 - *razmotriti pitanje organa za provođenje Zakona (neki od postojećih organa ili novi organ (Agencija), pa imamo sljedeći:*
 - *ako je opredjeljenje formiranje novog organa (Agencije), preciznije definisanje nadležnosti Agencije,*
 - *postupak prijavljivanja imovine, poklona, izabranih i imenovanih zvaničnika i savjetnika,*
 - *definisiranje nadzora nad radom Agencije.*
4. *Skupština Kantona Sarajevo zadužuje premijera Kantona Sarajevo da u roku od 45 dana pripremi i Skupštini dostavi Nacrt zakona.*

AD -2.

S OBZIROM DA JE VLADA DOSTAVILA ZAKLJUČAK SA AMANDMANIMA, PREDSEDAVAJUĆI JE POZVAO POSLANIKE DA PRISTUPE IZJAŠNJAVANJU O PRIJEDLOGU ZAKONA O OBRAZOVANJU ODRASLIH DA PREDLOŽENIM AMANDMANIMA.

SKUPŠTINA JE JEDNOGLASNO (24 "ZA") DONIJELA ZAKON O OBRAZOVANJU ODRASLIH.

AD – 6.

PRIJEDLOG AUTENTIČNOG TUMAČENJA ODREDAVA ČLANA 163. STAV (15) ZAKONA O VISOKOM OBRAZOVANJU

Autentično tumačenje Zakonodavno – pravne komisije Skupštine Kantona Sarajevo su poslanici dobili u dopunskom materijalu.

Zastupnik Kemal Ademović kao predsjedavajući Zakonodavno-pravne komisije je podnio uvodne napomene.

PRIJAVLJENIH ZA RASPRAVU NIJE BILO PA JE PREDSEDAVAJUĆI POZVAO ZASTUPNIKE DA SE IZJASNE DA LI POSTOJI OSNOVANOST ZA DAVANJE AUTENTIČNOG TUMAČENJA ČLANA 163. STAV (15) ZAKONA O VISOKOM OBRAZOVANJU.

SKUPŠTINA JE JEDNOGLASNO (21 "ZA") DONIJELA ODLUKU O OSNOVANOSTI AUTENTIČNOG TUMAČENJA.

S OBZIROM DA JE SKUPŠTINA POTVRDILA OSNOVANOST ZAHTJEVA ZA AUTENTIČNIM TUMAČENJEM PREDSEDAVAJUĆI JE POZVAO POSLANIKE NA GLASANJE O PRIJEDLOGU AUTENTIČNOG TUMAČENJA ČLANA 163. STAV (15) ZAKONA O VISOKOM OBRAZOVANJU.

SKUPŠTINA JE JEDNOGLASNO (21 "ZA") USVOJILA AUTENTIČNO TUMAČENJE ČLANA 163. STAV (15) ZAKONA O VISOKOM OBRAZOVANJU.

AD – 7.

PRIJEDLOG ODLUKE O PRISTUPANJU IZRADI IZMJENA I DOPUNA PROSTORNOG PLANA POSEBNOG PODRUČJA PRIRODNOG NASLJEĐA „VODOPAD SKAKAVAC“

Prijedlog odluke su poslanici dobili uz poziv za sjednicu.

Ministar prostornog uređenja, građenja i zaštite okoliša Čedomir Lukić podnio je uvodne napomene po ovom Prijedlogu odluke.

PRIJAVLJENIH ZA RASPRAVU NIJE BILO PA JE PREDSJEDAVAJUĆI POZVAO POSLANIKE DA PRISTUPE IZJAŠNJAVANJU O PRIJEDLOGU ODLUKE O PRISTUPANJU IZRADI IZMJENA I DOPUNA PROSTORNOG PLANA POSEBNOG PODRUČJA PRIRODNOG NASLJEĐA „VODOPAD SKAKAVAC“.

SKUPŠTINA JE JEDNOGLASNO (19 "ZA") DONIJELA OVU ODLUKU.

AD – 8.

PRIJEDLOG ODLUKE O USVAJANJU PROGRAMA UREĐENJA GRAĐEVINSKOG ZEMLJIŠTA I REALIZACIJE KAPITALNIH INVESTICIJA ZA 2015. GODINU

Prijedlog odluke poslanici su dobili uz poziv za sjednicu.

PREDLAGAČ NIJE IMAO POTREBE ZA UVODNIM NAPOMENAMA I NIJE BILO PRIJAVLJENIH ZA RASPRAVU, PA JE PREDSJEDAVAJUĆI POZVAO POSLANIKE DA PRISTUPE IZJAŠNJAVANJU O PRIJEDLOGU ODLUKE O USVAJANJU PROGRAMA UREĐENJA GRAĐEVINSKOG ZEMLJIŠTA I REALIZACIJE KAPITALNIH INVESTICIJA ZA 2015. GODINU.

SKUPŠTINA JE JEDNOGLASNO (21 "ZA") DONIJELA ODLUKU O USVAJANJU PROGRAMA UREĐENJA GRAĐEVINSKOG ZEMLJIŠTA I REALIZACIJE KAPITALNIH INVESTICIJA ZA 2015. GODINU.

AD – 9.

PRIJEDLOZI ODLUKA O DAVANJU SAGLASNOSTI NA PROGRAM RADA SA FINANSIJSKIM PLANOM JU ZA 2015.GODINU:

- a) "Narodno pozorište" Sarajevo;
- b) "Sarajevska filharmonija";
- c) "Pozorište mladih Sarajevo";
- d) "Kamerni teatar '55" Sarajevo;
- e) "Sarajevski ratni teatar - SARTR";
- f) "MES – Međunarodni teatarski festival – Scena MESS";
- g) Muzej Sarajevo sa;
- h) Kantonalni zavod za zaštitu kulturno-historijskog i prirodnog nasljeđa Sarajevo;
- i) Historijski arhiv Sarajevo;
- j) "Biblioteka" Sarajevo;
- k) Muzej "Alija Izetbegović";
- l) Centar za kulturu Kantona Sarajevo;

S obzirom da se svi pomenuti programi rada odnose na javne ustanove iz oblasti kulture, predsjedavajući je predložio da se obavi objedinjena rasprava, a da se izjašnjanje

pojedinačno za svaku ustanovu. **SKUPŠTINA JE JEDNOGLASNO PRIHVATILA PRIJEDLOG PREDSJEDAVAJUĆEG.**

Jedini diskutanti po ovoj tački dnevnog reda bili su zastupnici Izudin Bajrović i Ana Babić, i nakon njihovog izlaganja uslijedilo je izjašnjavaње.

PREDSJEDAVAJUĆI JE PREDLOŽIO DA SE SKUPŠTINA PO OVIM PROGRAMIMA RADA SA FINANSIJSKIM PLANOVIMA USTANOVA IZ KULTURE IZJASNI U PAKETU I SKUPŠTINA JE TO PRIHVATILA.

SKUPŠTINA JE JEDNOGLASNO (22 "ZA") USVOJILA PROGRAME RADA SA FINANSIJSKIM PLANOVIMA JAVNIH USTANOVA IZ KULTURE OD a) DO l).

AD – 10.

IZVJEŠTAJ O RADU I FINANSIJSKOM POSLOVANJU JAVNE USTANOVE "BIBLIOTEKA SARAJEVO" ZA 2014. GODINU

Izvještaj su poslanici dobili uz poziv za sjednicu.

BEZ UVODNIH NAPOMENA I BEZ RASPRAVE, ODMAH JE USLIJEDILO IZJAŠNJAVANJE O IZVJEŠTAJU O RADU I FINANSIJSKOM POSLOVANJU JAVNE USTANOVE "BIBLIOTEKA SARAJEVO" ZA 2014. GODINU.

SKUPŠTINA JE JEDNOGLASNO (21 "ZA") USVOJILA OVAJ IZVJEŠTAJ.

AD – 11.

- a) **IZVJEŠTAJ O POSLOVANJU KANTONALNOG JAVNOG KOMUNALNOG PREDUZEĆA „GRAS“ D.O.O. SARAJEVO U 2013. GODINI;**
- b) **IZVJEŠTAJ O POSLOVANJU KANTONALNOG JAVNOG KOMUNALNOG PREDUZEĆA „GRAS“ D.O.O. SARAJEVO U 2014. GODINI.**

S obzirom da se oba izvještaja odnose na isto javno komunalno preduzeće, predsjedavajući je predložio da se obavi jedinstvena rasprava a izjašnjavaње pojedinačno. Skupština je ovaj prijedlog jednoglasno prihvatila.

Izvještaje su poslanici dobili uz poziv za sjednicu.

Ministar saobraćaja Mujo Fišo je podnio uvodne napomene po ova dva Izvještaja. Nakon obraćanja ministra saobraćaja Muje Fiše uslijedila je diskusija u kojoj su učestvovali sljedeći poslanici: Edin Forto, Zvonko Marić, Adnan Solaković, Predrag Kojović, Eldar Čomor, Mirza Čelik i Semir Halilović.

Premijer Elmedin Konaković se nakon diskusije obratio poslanicima i dao pojašnjenja i odgovore na pitanja vezano za ova dva Izvještaja.

Uslijedilo je pojedinačno izjašnjavaње po podtačkama.

a)
PREDSJEDAVAJUĆI JE POZVAO POSLANIKE DA PRISTUPE IZJAŠNJAVANJU O IZVJEŠTAJU O POSLOVANJU KANTONALNOG JAVNOG KOMUNALNOG „GRAS“ D.O.O. SARAJEVO U 2013. GODINI.

SKUPŠTINA (20 "PROTIV" I 1 "SUZDRŽAN") NIJE USVOJILA IZVJEŠTAJ O POSLOVANJU KANTONALNOG JAVNOG KOMUNALNOG „GRAS“ D.O.O. SARAJEVO U 2013. GODINI.

b)
PREDSJEDAVAJUĆI JE POZVAO POSLANIKE DA PRISTUPE IZJAŠNJAVANJU O IZVJEŠTAJU O POSLOVANJU KANTONALNOG JAVNOG KOMUNALNOG PREDUZEĆA „GRAS“ D.O.O. SARAJEVO U 2014. GODINI.

SKUPŠTINA (19 "PROTIV" I 2 "SUZDRŽAN") NIJE USVOJILA IZVJEŠTAJ O POSLOVANJU KANTONALNOG JAVNOG KOMUNALNOG „GRAS“ D.O.O. SARAJEVO U 2014. GODINI.

S obzirom da su iscrpljene sve tačke Dnevnog reda Sedme Radne sjednice predsjedavajući Sejo Bukva je u 17 sati zaključio rad Sedmoj Radnoj sjednici Skupštine Kantona Sarajevo.

Zapisnik izradila:
Jasminka Deliahmetović

Po ovlaštenju

SEKRETAR

SKUPŠTINE KANTONA SARAJEVO

Almira Kulovac Šetkić, dipl. pravnik

PREDSJEDAVAJUĆI

SKUPŠTINE KANTONA SARAJEVO

Sejo Bukva